

**FRAMKVÆMDARREGLUGERÐ FRAMKVÆMDASTJÓRNARINNAR  
(ESB) 2016/462****2016/EES/57/41****frá 30. mars 2016****um breytingu á reglugerð (EB) nr. 324/2008 um endurskoðaðar verklagsreglur um framkvæmd  
skoðana framkvæmdastjórnarinnar á sviði siglingaverndar (\*)**

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (EB) nr. 725/2004 frá 31. mars 2004 um að efla vernd skipa og hafnaraðstöðu <sup>(1)</sup>, einkum 4. mgr. 9. gr.,*og að teknu tilliti til eftirfarandi:*

- 1) Til að fylgjast með beitingu reglugerðar (EB) nr. 725/2004 og tilskipunar Evrópuþingsins og ráðsins 2005/65/EB<sup>(2)</sup> í aðildarríkjunum ætti framkvæmdastjórnin að annast skoðanir. Nauðsynlegt er að framkvæmdastjórnin hafi yfirumsjón með skipulagi skoðana til að sannprófa skilvirkni landbundinna áætlana um gæðaeftirlit og ráðstafana, verklagsregluna og mannvirkja á sviði siglingaverndar.
- 2) Siglingaöryggisstofnun Evrópu, sem var komið á fót með reglugerð Evrópuþingsins og ráðsins (EB) nr. 1406/2002<sup>(3)</sup>, aðstoðar framkvæmdastjórnina við framkvæmd skoðunarverkefnanna. Við framkvæmd skoðunarverkefna á vettvangi Evrópska efnahagssvæðisins leitar framkvæmdastjórnin eftir aðstoð landsbundinna skoðunarmanna sem eru á skrá hjá ríkjum innan Fríverslunarsamtaka Evrópu (EFTA) í samræmi við ákvörðun sameiginlegu EES-nefndarinnar nr. 116/2008<sup>(4)</sup>.
- 3) Í reglugerð framkvæmdastjórnarinnar (EB) nr. 324/2008<sup>(5)</sup> er mælt fyrir um verklagsreglur um framkvæmd skoðana framkvæmdastjórnarinnar á sviði siglingaverndar á gagnsæjan, skilvirkan, samhæðan og samræmdan hátt.
- 4) Í ljósi þeirrar reynslu sem fengist hefur síðan 2008 er nauðsynlegt að ganga úr skugga um að skoðanir framkvæmdastjórnarinnar samkvæmt reglugerð (EB) nr. 324/2008 fari fram á samræmdan hátt í samræmi við fasta málsmeðferð, þ.m.t. staðlaðar aðferðir. Ráðstafanirnar til að efla samstarf aðildarríkjanna og beitingu heimilda framkvæmdastjórnarinnar ættu að vera skilvirkar og gagnsæjar.
- 5) Vinna ætti að frekari þróun skilgreininga þeirra hugtaka sem eru notuð í tengslum við framkvæmd skoðana framkvæmdastjórnarinnar. Endurskoðanirnar rýmka ekki umfang skoðana umfram núgildandi valdsvið.
- 6) Framkvæmdastjórnin og aðildarríkin skulu vinna saman að undirbúningi og framkvæmd skoðana á vegum framkvæmdastjórnarinnar.
- 7) Framkvæmdastjórnin ætti að hafa þann kost að hafa í skoðunarteymi sínu hæfa landsbundna skoðunarmenn, sem aðildarríkin útvega, sem uppfylla nauðsynlegar viðmiðanir fyrir menntun og hæfi og þjálfun.
- 8) Í því skyni að tryggja að skoðun framkvæmdastjórnarinnar fari fram með gagnsæjum og skilvirkum hætti ættu ákvæðin að vera skýr og þau þróuð enn frekar, einkum þegar um er að ræða skipaskoðun sem lýkur í höfn aðildarríkis annarri en þeirri höfn þar sem skoðunaraðilar gengu um borð. Skýra ætti tilhögun við skoðun skipa, sem sigla undir fána ESB, sem fer fram á stað utan Evrópusambandsins í því skyni að taka á tilteknum skipulagstengdum takmörkunum sem tengjast slíkum skoðunum.

(\*) Þessi ESB-gerð birtist í Stjtið. ESB L 80, 31.3.2016, bls. 28. Hennar var getið í ákvörðun sameiginlegu EES-nefndarinnar nr. 193/2016 frá 23. september 2016 um breytingu á XIII. viðauka (Flutningastarfsemi) við EES-samninginn, biður birtingar.

<sup>(1)</sup> Stjtið. ESB L 129, 29.4.2004, bls. 6.

<sup>(2)</sup> Tilskipun Evrópuþingsins og ráðsins 2005/65/EB frá 26. október 2005 um að efla hafnarvernd (Stjtið. ESB L 310, 25.11.2005, bls. 28).

<sup>(3)</sup> Reglugerð Evrópuþingsins og ráðsins (EB) nr. 1406/2002 frá 27. júní 2002 um stofnun Siglingaöryggisstofnunar Evrópu (Stjtið EB L 208, 5.8.2002, bls. 1).

<sup>(4)</sup> Ákvörðun sameiginlegu EES-nefndarinnar nr. 116/2008 frá 7. nóvember 2008 um breytingu á XIII. viðauka (Flutningar) við EES-samninginn (Stjtið. ESB, L 339, 18.12.2008, bls. 106).

<sup>(5)</sup> Reglugerð framkvæmdastjórnarinnar (EB) nr. 324/2008 frá 9. apríl 2008 um endurskoðaðar verklagsreglur um framkvæmd skoðana framkvæmdastjórnarinnar á sviði siglingaverndar (Stjtið ESB L 98, 10.4.2008, bls. 5).

- 9) Viðkvæmar en ekki trúnaðarflokkaðar upplýsingar sem varða skoðun ætti að meðhöndla með hliðsjón af ströngum öryggisráðstöfunum í því skyni að ábyrgjast að farið verði með þær sem trúnaðarmál og koma í veg fyrir birtingu þeirra.
- 10) Því ætti að breyta reglugerð (EB) nr. 324/2008 til samræmis við það.
- 11) Ráðstafanirnar, sem kveðið er á um í þessari reglugerð, eru í samræmi við álit nefndarinnar sem komið var á fót með 1. mgr. 11. gr. reglugerðar (EB) nr. 725/2004.

SAMÞYKKT REGLUGERÐ ÞESSA:

*1. gr.*

**Breytingar á reglugerð (EB) nr. 324/2008**

Reglugerð (EB) nr. 324/2008 er breytt sem hér segir:

- 1) Ákvæðum 2. gr. er breytt sem hér segir:

- a) Í stað 1. og 2. liðar komi eftirfarandi:

„1. „skoðun á vegum framkvæmdastjórnarinnar“: rannsókn af hálfu skoðunarmanna framkvæmdastjórnarinnar á gæðaeftirlitskerfum aðildarríkjanna, ráðstöfunum, verklagsreglum og mannvirkjum á sviði siglingaverndar í hverju ríki fyrir sig til að ákvarða hvort ákvæði reglugerðar (EB) nr. 725/2004 séu uppfyllt og framkvæmd tilskipunar 2005/65/EB. Þessi skoðun getur falið í sér skoðun á höfnum, hafnaraðstöðu, skipum, lögbærum yfirvöldum siglingaverndar eða útgerðarfélögum, eins og þau eru skilgreind í I. viðauka reglugerðar (EB) nr. 725/2004. Hún getur einnig falið í sér skoðun á viðurkenndum verndaraðilum, eins og þeir eru skilgreindir í I. viðauka við reglugerð (EB) nr. 725/2004 og í IV. viðauka við tilskipun 2005/65/EB sem fjallar um viðurkennda verndaraðila,

2. „skoðunarmaður framkvæmdastjórnarinnar“: einstaklingur sem uppfyllir kröfurnar, sem tilgreindar eru í 7. gr., og sem framkvæmdastjórnin eða Siglingaöryggisstofnun Evrópu ræður til starfa, eða landsbundinn skoðunarmaður með umboð framkvæmdastjórnarinnar til að taka þátt í skoðunum á vegum framkvæmdastjórnarinnar, og er á skrá hjá aðildarríkjunum eða EFTA-rikjunum,“.

- b) Í stað 11. liðar komi eftirfarandi:

„11. „höfn“: svæði innan marka sem aðildarríkin skilgreina skv. 3. mgr. 2. gr. í tilskipun 2005/65/EB og tilkynna framkvæmdastjórninni um það skv. 12. gr. í sömu tilskipun,“.

- c) Eftirfarandi 12., 13., 14., 15., 16. og 17. liður bætist við:

„12. „bráðabirgðaráðstöfun til úrbóta“: tímabundin ráðstöfun eða ýmsar ráðstafanir sem miða að því að takmarka, að því marki sem mögulegt er, áhrif grófra frávíka eða frávíka sem koma í ljós við skoðun áður en úrbætur eru gerðar að fullu,

13. „trúnaðarupplýsingar“: auðkenndar eða auðgreinanlegar upplýsingar sem er aflað við framkvæmd skoðana, sem geta leitt til brots á öryggisreglum ef þær yrðu birtar, og sem flokkast sem trúnaðarupplýsingar í samræmi við ákvæði ákvörðunar framkvæmdastjórnarinnar (ESB, KBE) 2015/444<sup>(1)</sup> eða í samræmi við viðkomandi landslöggiöf aðildarríkjanna,

14. „viðkvæmar en ekki trúnaðarflokkaðar upplýsingar“: upplýsingar sem tengjast skoðunum eða upplýsingar sem er aflað við framkvæmd skoðana, sem geta leitt til brots á öryggisreglum ef þær yrðu birtar og má einungis deila þeim á grundvelli vitneskjuþarfar,

15. „ekki staðfest“: niðurstaða fengin við skoðun á vegum framkvæmdastjórnarinnar sem bendir til þess að ekki sé farið eftir ákvæðum reglugerðar (EB) nr. 725/2004 eða tilskipunar 2005/65/EB en er ekki rökstudd með hlutlægum sönnunargögnum,

16. „nefnd“: sú nefnd sem komið var á fót skv. 1. mgr. 11. gr. reglugerðar (EB) nr. 725/2004,

17. „fulltrúi fánaríkis“: aðili lögbærs yfirvalds þess aðildarríkis sem er fánaríki skipsins eða, ef aðillinn er tilnefndur af því aðildarríki, fulltrúi viðurkennds verndaraðila.“

<sup>(1)</sup> Ákvörðun ráðsins (ESB, KBE) 2015/444 frá 13. mars 2015 um reglur varðandi öryggismál til verndar trúnaðarupplýsingum ESB (Stjtið. ESB L 72, 17.3.2015, bls. 53).

2) Í stað 3. gr. komi eftirfarandi:

„3. gr.

#### **Samvinna milli aðildarríkja**

1. Með fyrirvara um ábyrgð framkvæmdastjórnarinnar skulu aðildarríkin sinna skoðunarverkefnum sínum í samvinnu við hana. Þessi samvinna skal fara fram á undirbúnings-, eftirlits- og skýrslugjafarstiginu.

2. Aðildarríkin skulu gera allar nauðsynlegar ráðstafanir til að tryggja að tilkynning um skoðun:

a) sæti ströngum verndarráðstöfunum til að koma í veg fyrir birtingu þeirra til að tryggja að skoðunarferlið skaðist ekki, og

b) sé miðlað til viðkomandi aðila á grundvelli vitneskjuþarfa.“

3) Í stað 2. mgr. 4. gr. komi eftirfarandi:

„2. Hvert aðildarríki skal sjá til þess að skoðunarmenn framkvæmdastjórnarinnar hafi greiðan aðgang að viðeigandi gögnum um vernd, óski þeir eftir því, sem eru nauðsynleg til að þeir geti gegnt skyldustörfum sínum í tengslum við skoðanir, og einkum:

a) að landsáætluninni um framkvæmd reglugerðar (EB) nr. 725/2004 sem um getur í 3. mgr. 9. gr. þeirrar reglugerðar,

b) að nýjustu gagnauppfærslunum, sem tengiliður leggur fram, og vöktunarskýrslum, sem um getur í 4. mgr. 9. gr. reglugerðar (EB) nr. 725/2004,

c) að niðurstöðunum úr vöktun aðildarríkisins með framkvæmd verndaráætlana hafna,

d) að viðkomandi áhættumati fyrir skip, höfn og hafnaraðstöðu og að viðkomandi verndaráætlunum fyrir skip, höfn og hafnaraðstöðu, að skráum um kennslu, þjálfun og æfingar í tengslum við skip, hafnir og hafnaraðstöðu, á meðan framkvæmdastjórnin framkvæmir skoðanir,

e) að tilkynningum aðildarríkjanna að því er varðar ákvarðanirnar sem um getur í 3. mgr. 3. gr. reglugerðar (EB) nr. 725/2004 sem voru teknar að loknu lögboðna verndaráættumatinu,

f) að öllum viðmiðunarreglum, leiðbeiningum eða verklagsreglum sem aðildarríkið gefur út vegna framkvæmdar reglugerðar (EB) nr. 725/2004 og tilskipunar 2005/65/EB.“

4) Ákvæðum 5. gr. er breytt sem hér segir:

a) Í stað 1. mgr. komi eftirfarandi:

„1. Í samráði við framkvæmdastjórnina skulu aðildarríkin, eftir því sem unnt er, útvega framkvæmdastjórninni landsbundna skoðunarmenn, sem geta tekið þátt í skoðunum á vegum framkvæmdastjórnarinnar, þ.m.t. á undirbúnings- og skýrslugjafarstiginu.“

b) Í stað 5. mgr. komi eftirfarandi:

„5. Beiðnir um að landsbundnir skoðunarmenn taki þátt í skoðunum á vegum framkvæmdastjórnarinnar skal tilkynna með góðum fyrirvara, að öllu jöfnu a.m.k. tveimur mánuðum áður en skoðun á að fara fram.“

5) Í stað 6. gr. komi eftirfarandi:

„6. gr.

#### **Tækniástoð Siglingaöryggisstofnunar Evrópu við skoðanir á vegum framkvæmdastjórnarinnar**

Þegar framkvæmdastjórnin nýtur tækniástoðar samkvæmt b-lið 2. mgr. 2. gr. reglugerðar (EB) nr. 1406/2002 skal Siglingaöryggisstofnun Evrópu útvega tæknilega sérfræðinga til að taka þátt í skoðunum á vegum framkvæmdastjórnarinnar, þ.m.t. á undirbúnings- og skýrslugjafarstiginu.“

6) Ákvæðum 7. gr. er breytt sem hér segir:

a) Ákvæðum 1. mgr. er breytt sem hér segir:

i. Í stað b-liðar komi eftirfarandi:

„b) góða verkþekkingu á öryggistækni og starfsaðferðum við siglingavernd,“.

ii. Í stað d-liðar komi eftirfarandi:

„d) verkþekkingu á þeirri starfsemi sem er til skoðunar,“.

iii. Eftirfarandi e- og f-liður bætast við:

„e) vitund um heilbrigðis-, öryggis- og verndarkröfur við vinnu í sjávarumhverfi,

f) þekkingu á helstu lagaskilyrðum sem gilda á sviði siglingaverndar.“

b) Í stað fyrstu undirgreinar 2. mgr. komi eftirfarandi:

„Til að teljast hæfir til að annast skoðanir á vegum framkvæmdastjórnarinnar skulu skoðunarmenn framkvæmdastjórnarinnar hafa lokið þjálfun með viðunandi árangri. Skoðunarmenn framkvæmdastjórnarinnar skulu gangast undir reglubundna þjálfun á a.m.k. fimm ára fresti til þess að uppfæra þekkingu sína.“

c) Eftirfarandi 4. mgr. bætist við:

„4. Ef háttsemi eða frammistaða skoðunarmanns við fyrri skoðun uppfyllir ekki kröfur þessarar reglugerðar skal sá skoðunarmaður ekki tilnefndur til að taka þátt í fleiri skoðunarverkefnum á vegum framkvæmdastjórnarinnar.“

7) Ákvæðum 8. gr. er breytt sem hér segir:

a) Í stað 1. mgr. komi eftirfarandi:

„1. Framkvæmdastjórnin skal tilkynna tengilið aðildarríkisins, á því yfirráðasvæði þar sem skoðun á að fara fram, um skoðun með a.m.k. sex vikna fyrirvara.

Samhliða tilkynningu um skoðun getur framkvæmdastjórnin sent tengiliðnum spurningalista, sem lögbært yfirvald fyllir út fyrir skoðun, ásamt beiðni um skjöl sem kunna að skipta máli. Útfyllti spurningalistinn og umbeðin skjöl skulu lögð fyrir framkvæmdastjórnina a.m.k. tveimur vikum áður en skoðun á að hefjast samkvæmt áætlun.

Stytta má fyrirvarann, sem kveðið er á um í fyrstu undirgrein, í tvær vikur hið minnsta að því tilskildu að framkvæmdastjórnin bregðist við sérstökum aðstæðum sem kunna að hafa veruleg, almenn áhrif á siglingavernd í Evrópusambandinu og að því tilskildu framkvæmdastjórnin ráðfæri sig fyrirfram við viðkomandi tengilið. Í því tilviki gildir önnur undirgrein ekki.“

b) Í stað 5. mgr. komi eftirfarandi:

„5. Þegar fánaríki er aðildarríki skal framkvæmdastjórnin, eins fljótt og auðið er, upplýsa tengilið þess aðildarríkis um að skoða megi skipið þegar það er í hafnaraðstöðunni. Ef skoðunin tekur til skips sem siglir undir fána annars aðildarríkis en þess yfirvalds sem er til skoðunar skal framkvæmdastjórnin upplýsa tengilið þess fánaríkisins til þess að gera megi nauðsynlegar ráðstafanir varðandi tilhöggun á skoðun um borð í því skipi.“

c) Í stað 9. mgr. komi eftirfarandi:

„9. Þegar framkvæmdastjórnin er viðstödd landsbundna skoðun eða sannprófun á skipi, sem fer fram á stað utan Sambandsins, skal framkvæmdastjórnin gera nauðsynlegar ráðstafanir í samráði við tengiliðinn til þess að fylgjast með skoðunum eða sannprófunum með fulltrúa fánaríkisins.“

8) Ákvæðum 10. gr. er breytt sem hér segir:

a) Í stað 1. og 2. mgr. komi eftirfarandi:

„1. Nota skal staðlaða aðferðafræði til að fylgjast með beitingu aðildarríkja á kröfunum um siglingavernd sem mælt er fyrir um í reglugerð (EB) nr. 725/2004 og í tilskipun 2005/65/EB.

2. Skoðunarmenn framkvæmdastjórnarinnar skulu ávallt vera í fylgd fulltrúa viðeigandi lögbærs yfirvalds meðan þeir framkvæma skoðanir. Fulltrúinn skal ekki hafa áhrif á skilvirkni eða árangur skoðunarinnar.

Skoðanirnar skulu fara þannig fram að atvinnureksturinn gangi sem greiðlegast fyrir sig. Í þessu skyni má skoðun á skipi, sem hófst í höfn, halda áfram eftir að skipið hefur siglt úr höfn, þegar við á og með fyrirframsamþykki fánaríkisins og skipstjóra skipsins.

Ef skip, sem er látið sæta skoðun, stundar alþjóðlegar átætlunarsiglingar milli tveggja eða fleiri aðildarríkja, getur skoðunin einnig tekið til farþega og ökutækja sem fara um borð og frá borði við upphaf og lok ferðarinnar. Í slíku tilviki skal framkvæmdastjórnin senda tengilið aðildarríkisins, í komuhöfninni, tilkynningu þar um, í samræmi við 1. mgr. 8. gr.“

b) Í stað 6. mgr. komi eftirfarandi:

„6. Með fyrirvara um 11. gr. skulu skoðunarmenn framkvæmdastjórnarinnar, eftir því sem við á og því verður við komið, flytja óformlega samantekt á staðnum um athugasemdir sínar.

Hlutaðeigandi tengiliður skal þegar í stað upplýstur um hvers konar gróft frávik frá reglugerð (EB) nr. 725/2004 eða tilskipun 2005/65/EB, sem koma fram við skoðun framkvæmdastjórnarinnar, áður en lokið hefur verið við skoðunarskýrsluna í samræmi við 11. gr. þessarar reglugerðar.

Í tilvikum þegar skoðunarmaður framkvæmdastjórnarinnar, sem framkvæmir skoðun skips, telur að um gróft frávik sé að ræða, sem gefur tilefni til aðgerða skv. 16. gr., skal hópstjórinn tafarlaust tilkynna viðkomandi tengiliðum þar um skriflega.“

c) Eftirfarandi 7. mgr. bætist við:

„7. Skoðunarmenn framkvæmdastjórnarinnar skulu framkvæma skoðanir á skilvirkan og árangursríkan hátt að teknu tilhlýðilegu tilliti til öryggis og verndar.“

9) Í stað 4. og 5. mgr. 11. gr. komi eftirfarandi:

„4. Þegar lagt er mat á framkvæmd reglugerðar (EB) nr. 725/2004 og tilskipun 2005/65/EB í samræmi við þessa reglugerð, skulu niðurstöðurnar flokkaðar í einn af eftirfarandi flokkum:

- a) samrýmist að öllu leyti,
- b) samrýmist en umbætur æskilegar,
- c) frávik,
- d) gróft frávik,
- e) ekki staðfest.

5. Í skýrslunni skal greint nánar frá niðurstöðum úr skoðuninni sem flokkast sem „gróft frávik“, „frávik“, „samrýmist en umbætur æskilegar“ og „ekki staðfest“ í tengslum við framkvæmd reglugerðar (EB) nr. 725/2004 eða tilskipunar 2005/65/EB í samræmi við þessa reglugerð.

Í skýrslunni geta verið tilmæli um aðgerðir til úrbóta.“

10) Eftirfarandi 3. mgr. bætist við 12. gr.:

„3. Ef aðildarríki leggur til tafarlausar ráðstafanir til úrbóta til að ráða bót á grófu frávikum sem komið hefur í ljós, skal það tilkynna framkvæmdastjórninni það þegar í stað, áður en framkvæmdastjórnin birtir skoðunarskýrslu sína. Í slíkum tilvikum skal greina í skýrslunni frá þeim aðgerðum til úrbóta sem aðildarríkið hefur gripið til. Ef gripið er til bráðabirgðaráðstafana eingöngu, skal aðildarríkið tafarlaust tilkynna það framkvæmdastjórninni og gera þar að auki grein fyrir tímamörkum fyrir framkvæmd endanlegra og heildstæðra aðgerða til úrbóta.“

11) Í stað 14. og 15. gr. komi eftirfarandi:

„14. gr.

#### **Trúnaður við meðferð upplýsinga**

Í samræmi við gildandi reglur skal framkvæmdastjórnin grípa til viðeigandi ráðstafana er hún framkvæmir skoðanir á sviði siglingaverndar til að vernda trúnaðarupplýsingar sem hún hefur aðgang að eða sem henni berast frá aðildarríkjum. Aðildarríki skulu grípa til jafngildra ráðstafana í samræmi við viðeigandi landslöggjöf sína.

Aðildarríki og framkvæmdastjórnin mega skiptast á viðkvæmum en ekki trúnaðarflokkuðum upplýsingum að því tilskildu að þau verndi þessar upplýsingar eins og gerð er krafa um til að tryggja að trúnaðar við meðferð þeirra verði gætt.

15. gr.

#### **Skoðunaráætlun framkvæmdastjórnarinnar**

1. Framkvæmdastjórnin skal ráðfæra sig við nefndina um forgangsröðun við framkvæmd skoðunaráætlunar sinnar.
2. Framkvæmdastjórnin skal tilkynna nefndinni reglulega um framkvæmd skoðunaráætlunar sinnar og um niðurstöður skoðananna. Framkvæmdastjórnin skal miðla til aðildarríkjanna góðum starfsvenjum sem komu í ljós við skoðanirnar.

Skoðunarskýrslur skulu venjulega gerðar aðgengilegar nefndinni:

- a) um leið og svar aðildarríkisins hefur borist skv. 1. mgr. 12. gr., og
- b) þegar málinu er lokið.“

12) Í stað fyrstu málsgreinar 16. gr. komi eftirfarandi:

Leiði skoðun í ljós gróft frávik frá reglugerð (EB) nr. 725/2004 eða tilskipun 2005/65/EB, sem talið er að hafi veruleg, almenn áhrif á siglingavernd í Sambandinu og sem ekki er unnt að bregðast við þegar í stað með bráðabirgðaráðstöfunum til úrbóta, skal framkvæmdastjórnin tilkynna hinum aðildarríkjunum um það þegar í stað eftir að hafa upplýst hlutaðeigandi aðildarríki um grófa frávikid.“

2. gr.

#### **Gildistaka**

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 30. mars 2016.

*Fyrir hönd framkvæmdastjórnarinnar,*

Jean-Claude JUNCKER

*forseti.*